

la cognoissance de Dieu, pour n'estre liez à aucun culte. Par la conduite desquels peuples, les fleuves, riuieres, lacs de largeur & longueur indicibles ont esté recognus par les supplians; mais comme le bien ne s'aquier sans peine, il n'y a point de doute que outre les grands labeurs des supplians en ses descouuertes & leur seiour dans le pays, ce qui leur donne le plus de trouble n'est pas seulement de s'estre trouué sans assistance d'aucune commodité, ains seulement de viures par ceux qui sont associez en ce commerce, ausquels seuls faut aduouer ceste obligation, mais que ces terres & leur abondance recogneuës par l'estranger, ils sont en perpetuelle crainte de surprises n'attendants que l'heure que l'on vienne couper la gorge à tous ceux qui resident audit Kebec. Car il ne faut pas tant s'asseurer aux paupieres abatuës des Lyons que l'on ne sçachent qu'ils mordent en dormant, & que les ennemis de vostre couronne, bien qu'ils semblent endormis ne viennent à l'appas de si grandes esperances de gain & de profit. En effect, Sire, qui ne se hazarderoit de venir posseder une terre si riche laquelle donne de ses || flancs des mines de fer & d'acier, 83 qui rendent quarante cinq pour cent, de plomb trente, du cuiure dix-huict, & qui en promet d'or & d'argent, terre qui donne par usure toutes sortes de semences, & laquelle des à present donne les materiaux propres pour la construction de toutes sortes de vaisseaux, fournissant le Meirain, Iantes, planchages pour fenestrages & lambris, & de plus les Gemmes, Pray & Raifine. En outre la pelleterie cy-dessus